

開放文學 – 江湖俠義 – 笏山記
第五十二回 亂宗嗣瞋雲私育偽儲君 媚鄰邦潛光忍遣廢王后

是夜潛光與家寶、春華等數十騎，隨著百全繞山陂而走，被可炭團截殺一陣，遁入山谿小徑，緣徑而走。家寶曰：「倘此徑有人截殺，我輩休矣。」言未已，見火把驟明，一將揮雙銀鞭，截住出路，蓋香得功也。潛光在馬上揖曰：「將軍別來無恙。」得功不語，努目視之。潛光曰：「孤與將軍，同興草澤，推食解衣，情同手足。將軍以孤不足有為，棄孤事故，是將軍之見幾早也，今夜詎不相容耶。」得功曰：「臣從大王平紹，難功最多，不幸為韓人所擄，卒能引王師破黃石，以謝大王，」言著以鞭指家寶曰：「不期這匹夫，日譖臣於王前，使臣幾死者數數，是王以草芥視臣也。夫俘虜之餘，誠不足為興朝人傑，但大丈夫激昂風雲，終有鬱而必發之日。」因顧左右曰：「這綸巾鶴氅騎白馬的，可與我拿來，以泄吾忿。」言罷，退去。軍中閃出偏將張安、魯琦揮刀直取家寶。家寶大驚，躲在潛光背後。潛光橫槍來戰張安，回顧春華，已被魯琦捉去了。正在驚惶，忽一軍如飛的斜刺殺來，正是紹將可伯符，殺退張安，引潛光、家寶下陂而走。得功也不追趕。走至天明，遇尹百全身中數槍從林子裡蹲出。是時，馬疲人瘁，同坐山陂，相對痛哭。又聽得人馬嘶喊，後面塵頭大起，眾軍心膽俱裂。潛光仰天歎曰：「蒼天，蒼天，於我何極。」方掉槍上馬，後面的追兵已近，馬上一人大呼曰：「大王休慌，某是雞叫鄉長平光紫也。大王速行，後面若有軍馬追來，臣自當之。」時十萬大軍，只剩得伯符部下三千騎，其餘皆帶重傷隨著潛光，從大路而走。將至碣門，丁勉之、可衍鴻率兵迎回眉京，居玲瓏苑，終夜驚悸，遂得病。